

Eich cyf/Your ref:  
Ein cyf/Our ref: MA P KW 5599 19

David Jones OBE, DL  
Cadeirydd Cymwysterau Cymru  
Q2 Building, Pencarn Lane,  
**Casnewydd**  
NP10 8UH

Mawrth 2020

Annwyl David,

### **Llythyr cylch gwaith tymor Llywodraeth Cymru ar gyfer Cymwysterau Cymru**

Rwy'n ysgrifennu atoch i gadarnhau'r Dyraniad Grant i Gymwysterau Cymru ar gyfer 2020-21. Rhoddir y grant i alluogi Cymwysterau Cymru i gyflawni ei swyddogaethau fel y'u nodir yn Neddf Cymwysterau Cymru 2015.

Mae Rhaglen Lywodraethu Llywodraeth Cymru yn nodi sut y byddwn yn cefnogi pobl ifanc yng Nghymru i gyflawni eu potensial i'r eithaf. Yn rhinwedd ei swyddogaeth fel rheoleiddiwr annibynnol, mae Cymwysterau Cymru'n gwneud cyfraniad pwysig i'r gwaith o gyflawni rhaglen Llywodraeth Cymru, er mwyn sicrhau bod gennym system gymwysterau gadarn, sy'n diwallu anghenion dysgwyr ac yn hybu hyder ymhlith y cyhoedd. Gwna hyn yn ogystal â'i waith presennol yn penderfynu ar y diwygiadau y mae angen eu gwneud i gymwysterau a'u cyflwyno, er mwyn cefnogi'r Cwricwlwm i Gymru.

Mae Adran 3 o Ddeddf Cymwysterau Cymru 2015 yn ei gwneud yn ofynnol i Gymwysterau Cymru weithredu mewn ffordd sydd, ym marn y sefydliad, yn addas i'r diben o gyrraedd y nodau pennaf, sef sicrhau bod cymwysterau, a system gymwysterau Cymru, yn gweithio'n effeithlon i ddiwallu anghenion rhesymol dysgwyr yng Nghymru, a hybu hyder yn y cymwysterau a'r system ymhlith y cyhoedd. Mae'r ddeddf hefyd yn ei gwneud yn ofynnol i Gymwysterau Cymru roi sylw dyledus i'r materion a restrir yn Adran 3(2) wrth fynd ati i ystyried beth sy'n briodol mewn perthynas â chyflawni'r nodau pennaf hynny.

Mae Adran 51 o Ddeddf Cymwysterau Cymru 2015 yn ei gwneud yn ofynnol i Gymwysterau Cymru ddarparu cyngor a gwybodaeth i Weinidogion Cymru ar faterion yn ymwneud â chymwysterau a'r system gymwysterau; rwy'n rhagweld y bydd fy swyddogion yn ysgrifennu atoch yn ystod 2020-21 i ofyn am gyngor o'r fath.

Fel y gwyddoch, nid yw Llywodraeth Cymru yn pennu eich amcanion strategol gan fod Deddf 2015 yn rhoi mesur o annibyniaeth ichi fel y rheoleiddiwr annibynnol. Fodd bynnag, mae rhaid ichi baratoi Adroddiad Blynyddol, y creffir arno gan y Senedd, yn ogystal â Chynllun Busnes sy'n cynnwys blaenoriaethau gweithredol y sefydliad am y flwyddyn i ddod.

Rydw i wedi ysgrifennu atoch ar wahân i nodi'r arian sydd ar gael ar gyfer 2020-21, sef flwyddyn olaf y tymor hwn o weithgarwch y Llywodraeth.

### **Gofynion Llesiant Cenedlaethau'r Dyfodol**

Mae Llywodraeth Cymru yn ei gwneud yn ofynnol i bob corff cyhoeddus yng Nghymru weithio'n unol â'r pum dull gweithredu a nodir yn Neddf Llesiant Cenedlaethau'r Dyfodol (Cymru) 2015. Disgwylir ichi drafod gyda'ch tîm partneriaeth sut y mae Cymwysterau Cymru yn defnyddio'r pum dull gweithredu, ynghyd â'ch cyfraniad at gyrraedd y saith nod llesiant, a sut y bydd y dull gweithredu hwn yn datblygu o flwyddyn i flwyddyn.

### **Cyllid**

Mae'r llythyr blynyddol ar gyfer cadarnhau cyllid yn nodi'r cyllid ar gyfer gweithgareddau'r flwyddyn 2020-21. Yn y dyfodol byddwch yn cael llythyr cylch gwaith ar gyfer tymor cyfan y Llywodraeth, ac yna'n cael llythyrau cyllid yn flynyddol. Pan fo modd, byddwch hefyd yn cael syniad bras o'r cyllid ar gyfer blynyddoedd i ddod.

### **Trefniadau Goruchwylio**

Mae trefniadau goruchwylio ac adrodd yn ôl wedi'u pennu eisoes, fel y nodir yn y Cytundeb Fframwaith. Datblygwyd atodiad i'r Cytundeb Fframwaith hwn i adlewyrchu'r diwygiadau i ddull Llywodraeth Cymru o reoli cyrff a noddir. Mae'r gwaith o gyttuno ar yr atodiad hwn yn mynd rhagddo.


Mae Llywodraeth Cymru yn defnyddio dull seiliedig ar risg ar gyfer y broses o oruchwylio. Mae'n gweithio gyda chyrff cyhoeddus i nodi'r lefel o oruchwyliaeth sy'n briodol ar gyfer sefydliadau unigol. Bydd y tîm partneriaeth yn cynnal asesiadau rheolaidd o'r sicrwydd sydd ar gael iddynt. Hefyd, yn ystod y tymor llywodraethol hwn, byddant yn ystyried yn flynyddol yr angen am adolygiad pwrpasol o'r sefydliad.

Bydd y trefniadau hyn yn parhau mewn grym gydol oes y weinyddiaeth hon, ond cynhelir trafodaethau â chi os yw blaenoriaethau gweinidogion yn newid. Ar ddiwedd y tymor llywodraethol hwn, bydd y trefniadau a nodir yn y llythyr cylch gwaith hwn yn parhau hyd nes y disodlir nhw.

Dylid ystyried y llythyr hwn ar y cyd â'r Cytundeb Fframwaith.

Edrychaf ymlaen at gydweithio â chi yn ystod y flwyddyn i ddod.

Yn gywir,



**Kirsty Williams AC / AM**

Y Gweinidog Addysg  
Minister for Education